

**Date – 20/04/2026**

**Time - 18:30 -18:40Hrs**

**AKASHVANI AIZAWL**

**REGIONAL NEWS BULLETIN**

**HEADLINES ( EVENING )**

1. Naktuka Aizawl Municipal Corporation inthlan vote thlak turin inbuatsaihna peihfel vek a ni tawh a, inthlan duty tur te pawhin an duty na hmun tur an thleng kim tawh.
2. Mizoramah eirawngbawlna gas, LPG dinhmun a tha a, mipuite tan chiaina tur leh mamawh aia tam chhek khawl tur a awm lo tih sorkarin a sawi.
3. West Bengal leh Tamil Nadu Assembly inthlanni atan ni hnih chiah a awm tawh avangin Political party hruaituten vote zawngin theihtawp an chhuah
4. Ma Prime Minister Narendra Modia leh South Korea President Lee Jae Myung te New Delhi-ah an inkawm.

<><><>

**AMC POLL PREPAREDNESS**

Mizoram State Election Commissioner Dr. H. Lalthlangliana'n naktuka Aizawl Municipal Corporation inthlan vote thlak turin inbuatsaihna zawng zawng peihfel a ni tawh a ti a, inthlan duty tur te pawhin an duty na hmun tur an thleng kim vek tawh a ni.

SEC Dr. H. Lalthlangliana chuan naktuk, April ni 21 zing dar 7 atanga tlai dar 5 inkarah vote thlak tur a ni tih sawiin, hemi atan hian political party tana campaign hun zawng zawng a tawp tawh avangin Silent Period puan a nih thu sawiin, whatsapp leh social media kaltlanga campaign pawh phal a nih tawh lo a ti a, vote nei zawng zawngte chu vote thlak turin an ngen a, voter ten rilru fim taka vote an thlak theihna turin political party leh party worker te chu insum turin an ngen bawk a ti a. Inthlan inbuatsaihna a muanawm ang bawkin, inthlan pawh muanawm taka an zawhfel an beisei tih a sawi a ni.

(Byte: Dr. H. Lalthlangliana)

Tukin dar 9:00 khan AMC, 2026 inthlanpuia General observer te leh Political party: BJP, INC, MNF leh ZPM aiawh te telpuina hnuaiyah EVM Strong room atanga EVM te lakchhuah a ni.

**VC**

*Aizawl Municipal Corporation inthlan vote thlak turah vawiin khan Lammual atangin chawhma dar 10:00 khan polling party 263 ten an duty-na hmun tur polling station theuh an pan a, tuang takin an thleng fel tih DEO & DMEO office chuan a sawi.*

*Vawiinah hian Polling team ten Polling station-a tih tur tul te an ti ang a, an area theuhva Polling Agent te nen naktuka felfai tak leh tuang taka vote thlak a nih theih nan inkawmhona hun te an nei bawh ang. Vawiin polling team fehchhuak ta te bakah hian a tulna hmun leh huna tirhchhuah theih tur Reserve Polling team zaa 20 an la awm bawh. Naktuk vote thlak hi felfai tak leh thianglim taka kalpui a nih theih nan; Security duty te bakah Sector officer te leh General Observer ten hneh takin an vil reng dawn a ni.*

<><><>

## **AMC POLLING DAY**

Naktuk hi Aizawl Municipal Corporation (AMC,2026) inthlanpui vote thlak ni a nih avangin Aizawl Municipality huam chhunga vote nei zawng zawng tan sorkarin chawlh a puang a,

Naktukah hian AMC huam chhunga sorkar office, zirna in leh public sector zawng zawng khar vek tur a ni.

AMC Inthlan Vote thlak ni naktukah Akashvani Regional News Unit chuan AMC polling Day Special Coverage neiin, chanchinthar chhiar hun pangngai zing dar 7.30, chawhnu dar 2 leh a chanve leh tlai lam dar 6 leh a chanve bakah Election Update Bulletin a siam belh dawn a, zing dar 9, chhun dar 11 leh chawhnu dar 1 ah te minute 5 chanchinthar update ngaihthlak tur a awm dawn a ni.

<><><>

## **NHRC SPECIAL MONITOR**

Ni thum cham turin National Human Rights Commission Special Monitor Dr. Poonam Malakondaiah chuan vawiin khan Aizawl a rawn thleng a.

National Human Rights Commission Special Monitor Dr. Poonam Malakondaiah hian Early Childhood Education lam thlur bingin, Anganwadi Center leh Elementary School kalpui dan a rawn bihchiang dawn a ni.

Dr. Poonam Malakondaiah hi Andhra Pradesh cadre IAS Officer pension a ni a. National Human Rights Commission ah hian Special Monitor in kumin January thla khan a thawk leh a ni.

<><><>

## **LPG STATUS**

Mizoramah eirawngbawlna gas, LPG dinhmun a tha a, mipuite tan chiaina tur leh mamawh aia tam chhek khawl tur a awm lo tih thuneituten an sawi.

Sorkar laipui Ministry of Information and Broadcasting hnuai Press Information Bureau (PIB), Aizawl leh Directorate Information & Public Relations (DIPR), Indian Oil Corporation (IOC) thawkho chuan vawiin khan DIPR Auditorium-ah thuthar thehdarhtute kawmin, tunhnaia West Asia-a indona thleng

avanga eirawngbawlina gas, LPG chungchanga Mizorama LPG dinhmun chungchang an sawifiah a. Tun dinhmunah Mizoramah dan pangngai angin Domestic LPG hralh chhuah mek a ni tih sawiin, chhung tinin pangngai taka LPG an dawn theih nan ngun takin vil mek a ni an ti a. IOC chuan chatlak awm lovin Mizorama chhungkaw nuai 2.97 te hnenah nitin gas cylinder sang 8 vel an sem chhuak ziah a, hei hi khawvel pum huapa energy lama buaina a chhuah hma a an sem zat ang tho a nih thu a sawi a ni.

LPG dinhmun a that avangin mipuite tan chiaina tur leh mamawh aia tam chhek khawl a tul lo tih sawiin, thuthang dik lo awih lo tur leh official information chauh ngaihven turin an chah a. IOC leh Mizoram sorkar chuan Dan lova gas hralh ruk leh mamawh aia tam khawl khawm a thlen loh nan Mizoram hmun hrang hrangah functional team ten LPG Distributor te chu hrih lawk lova endikna an nei thin a, dan zawm lo te chu a tul anga hrem an ni thu an sawi a, Gas thun khah mamawhte chu digital hmangin SMS emaw Interactive Voice Response System, (IVRS) emaw ti thin turin an chah a, tun dinhmunah digital kaltlang a book sing 2, sang 5 vel a awm tih an sawi bawk a, gas cylinder te hian a book tu dik tak te hnen a thleng ngei tih finfiah nan Delivery authentication codes (DAC OTP) hman a nih thu an sawi bawk a ni.

Pu Vanlalvuta Chinzah chuan Mizoramah digital mode hmanga gas refill tura booking chu zaa 80 atangin indona chhuah hnuah zaa 88-ah a pung a ti a, mobile signal awm miah lohna khua te a la awm avangin gas book lamah harsatna an tawh tih sawiin, mipuite mamawh anga gas sem chhuah a nih theih nan checkgate thenkhatah te cylinder lo dil thin lo se a ti bawk.

Byte: IOC official Vanlalvuta Chinzah

Tun dinhmunah Mizoramah LPG distributor- 60 an awm a, chhungkaw nuai 2.97-a mi nuai 3, sing 7, sang 4, 323 ten an hmang mek a ni.

<><><>

## LAWNGTLAI CRIME REVIEW MEETING

Lawngtlai SP Office Chamber-ah Crime review Meeting neih a ni a,

SP Pu PC Lalchunlura chuan Police Officer te chu mipui rawngbawltu an nih angin tanpuina beiseia an hnena lo kalte tibeidawng lo va, a theih chin chinah an harsatna chinfel sak chu an hna a ni tih hre thar turin a chah a ni

He Meeting-ah hian kum 2025 chhunga case register leh kumin April thla thlenga case register te khaikhin leh zirho a ni a. Nikum chhung khan case 69 register niin nikum Jan atanga April ni 17 inkarah case 19 chauh register anih laiin kumin Jan leh April ni 7 inkarah case 38 register a ni tih he meeting-ah hian tarlan a ni.

He meeting-ah hian Case pending leh an pending chhan te sawi ho a ni a, SP Lawngtlai chuan Investigating Officer te an case-ah theihtawp chhuah zel tura a fuih bakah Officer dangte pawh inrawnkuala theihtawp inchhuahpui zel turin a hrih a ni.

<><><>

## **CADC**

Chakma Autonomous District Council (CADC) hnuaia khawtlang huap pawl hrang hrang thawkhovin Parva-I a Central Young Lai Association (CYLA) in ramri lung an phun chungchangah Larsap chu a rang thei ang bera inrawlh turin an ngen.

CADC-a khawtlang huap pawl hrang hrang- Central Young Chakma Association (CYCA), Mizoram Chakma Students' Union, Chakma Mahila Samiti, Teachers' Association, Employees' Association leh pawl dang aiawhte chuan tun thla ni 18-a an thurel bawhzuiin, vawiin khan Larsap chenna Lok Bhawan-ah an kal a, kumin February ni 13-a CYLA-in Parva-I ah phalna nei lova ramri lung an phun chuan hun rei tawh tak atanga Lai leh Chakma hnamte inlungruual taka an lo chen ho thin chu a nghawng chhiat theih avangin hemi chungchangah hian Larsap chu a rang thei ang bera inrawlh turin an ngen a ni.

CADC-a khawtlang huap pawl hrang hrang aiawh thukhawm te chuan Chakma Autonomous District Council (CADC) leh Lai Autonomous District Council (LADC) inrina chu Pawi-Lakher Region (Re-Organization) Order, 1972 ah chiang taka sawifiah a nih thu sawiin, hetah hian an inrina chu Sanghatuilo Lui atanga Tuichawng Lui infinna thleng a nih thu an sawi a, ParvaI, Parva-II, Parva-III, Bundukbanga, Gavasury, leh Siminesora te chu CADC huamchhungah a awm tih an sawi bawk a ni.



## **MISS UNIVERSE INDIA-MIZORAM**

Miss Universe India thlanna a Mizoram aiawha tel tur thlanna Miss Universe Mizoram chu naktuk zan hian Lunglei Sazaikawna Multipurpose Hall ah thlan a ni dawn.

He hun a Chief Judge tur Miss Universe India ni mek Monica Vishwa Karna chuan vawiin khan Lunglei a thleng a. Miss Universe India nihna chelh mektu hi Rajasthan state mi niin ft 5.8 a sang a ni.

Miss Universe a Mizoram aiawh tur hi SIAR management Aizawl ten an buaipui a, Organising Comtt ah hian HPC Lunglei, Sub.Hqtrs YMA, MJA te an tel a ni.



## **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



## **CAMPAIGN**

West Bengal leh Tamil Nadu Assembly inthlanni atan ni hnih chiah a awm tawh avangin Political party hruaituten vote zawngin theihtawp an chhuah. West Bengal leh chaun BJP leader leh Union Minister JP Nadda chuan Bankura-a

Kotulpur ah thu a sawi a. Trinamool Congress hruaitu Abhishek Bandopadhyay pawhin Bankura-a Ranibandh ah thu a sawi a. BJP leader Rajnath Singh pawhin Birbhum ah thu sawiin BJP President Nitin Nabina'n Purba Medinipur ah kawngzawh a huaihawt bawk a ni. Trinamool Congress hruaitu leh West Bengal Chief minister Mamata Banerjee chuan North 24 Parganas-a Khardaha ah thu a sawi a. Congress President Mallikarjun Kharge pawhin Coochbehar leh Silliguri ah thu a sawi bawk a ni.

Tamil Nadu ah chuan Telegu Desam Party leader leh Andhra Pradesh Chief Minister Chandrababu Naidu leh Union Civil Aviation Minister leh TDP Leader Kinjarapu Rammohan Naidu ten NDA thawhpuite tan Coimbatore ah an campaign a. Pu Naidua chuan thusawiin Prime Minister Narendra Modia kut chu tihchak a tul thu sawiin state leh sawrkar laipuite inlunguala an kal a ngai a ti bawk.

Congress hruaitu Rahul Gandhi pawhin vawiin khan Kanyakumari ah thusawiin Virudhunagar halpuah siamna hmuna thite a tawrhpu thu a sawi a. Pu Gandhi-a chaun state mal tin leh an tawngte chu ram tana pawimawh vek an nih thu a sawi a. AIADMK te chu NDA nen an thawhdun avangin a sawisel bawk a ni.

<><><>

#### **SOUTH KOREA PRESIDENT**

Prime Minister Narendra Modia leh South Korea President Lee Jae Myung te New Delhi-ah an inkawm a. South Korea leh India ten thawhdunna tur inremna thuthlung MoU engemawzat an ziak a. Heng zingah hian infiamna sports leh Cultural leh thilthar siamchhuahna lam industry a thawhdunna te a tel.

Hruaitu pahnihten chanchinbumite an kawmnaah Pu Modia chuan mipui rorelna, eibar zawna kawnga dikna leh dan rorelna chu ram pahnih zunzama a bet tlat a ti a. Indo-pacific thilthleng chungchangah pawh ngaihda inang an neih thu a sawi a. Kum 10 kalta chhungin ram pahnih inlaichinna chu a thang nasa hle a ti a. President Lee alo zin avangin ram pahnih hmalam huna thawhdunna tur tam tak a pian belh ang a ti bawk.

<><><>